

Keprihatinan PM selesaikan masalah 167 penyewa di BB Plaza

# Peniaga ucap terima kasih

Oleh **NAZMIL NASIRUDDIN**  
kota@utusan.com.my

**PUTRAJAYA** 6 Julai - Kumpulan penyewa lot niaga di Bukit Bintang Plaza (BB Plaza) mengucapkan jutaan terima kasih kepada Datuk Seri Najib Tun Razak atas keprihatinan beliau sehingga menyebabkan bangunan yang menyedai sumber rezeki kepada mereka tidak jadi dirobohkan.

Presiden Pertubuhan Ikatan Usahawan Kecil dan Sederhana (Ikhlas), Mohd. Ridzuan Abdullah (**gambar**) yang mewakili kumpulan penyewa



berkenaan berkata, ternyata Perdana Menteri memandang serius isu tersebut dan bertindak pantas menyelesaikan masalah 167 penyewa di situ.

"Sekiranya rancangan merobohkan BB Plaza diteruskan untuk memberi laluan kepada pembinaan My Rapid Transit (MRT) sudah tentu para penyewa di situ hilang mata pencarian dan akan dihipit pel-

bagai masalah.

"Sekali lagi terima kasih saya ucapkan kepada Perdana Menteri dan tidak lupa juga kepada Pegawai Khas beliau, Datuk Ghazali Ibrahim yang menerima memo bantahan kami pada 28 Jun lepas," katanya kepada *Utusan Malaysia* di sini hari ini.

Sehubungan itu, Mohd. Ridzuan meminta para pemimpin lain mencontohi cara kerja Najib yang mengutamakan kebajikan rakyat dan bertindak pantas dalam menyelesaikan sesuatu masalah.

Akhbar Rabu lalu melaporkan persetujuan Mass Rapid Transit Co-

poration Sdn. Bhd. (MRT Corp.) dan UDA Holdings Berhad (UDA) untuk mengubah pelan reka bentuk stesen My Rapid Transit (MRT) agar tidak perlu membabitkan secara langsung kawasan BB Plaza.

Menurut kenyataan tersebut berdasarkan pelan baru itu, Stesen Sentral BB akan dibina berasingan bagi mengelakkannya daripada bersepadu secara langsung dengan bangunan BB Plaza.

Sementara itu, Setiausaha Gabungan NGO Malaysia (GNM), Mohd. Jurit Ramli berkata, beliau kesal dengan tindakan pihak pembangkang

yang cuba meracuni fikiran para penyewa berhubung isu BB Plaza tersebut.

"Pihak pembangkang cuba mengelirukan mereka dengan mengatakan kerajaan tidak cuba untuk membantu dalam hal ini dan termasuk beberapa tohmahan lain yang dilemparkan kepada kerajaan.

"Namun sebenarnya, mereka hanya tahu menabur fitnah dan tidak mampu berbuat apa-apa untuk membantu golongan penyewa ini, tidak seperti kerajaan yang berusaha membela nasib golongan penyewa," katanya.